

REFUGEES

Adviser to chief minister (political) Pu Lalmuanpuia Punte chuan mi thenkhatin thu dik lo hmanga Mizorama himna zawnga rawn raltlante an puhna chu Police te'n a dik lohzia an rawn pho chhuak a ni, a ti.

Pu Lalmuanpuia'n Akashvani Aizawl a hrilh danin kum 2023 September leh nikum December thla inkar chhung khan Police-te'n dan bawhchhiatna nasa taka an beih letna-ah mi 3,210 an man thu a sawi a. He'ng an mi man zinga za zela 42 chu rukruk vanga man an ni a, ruihhlo vanga man chu za zela 16 an ni a, zu khapna dan bawhchhia an mante cu za zela 14 an ni a ti a. Police-ten mi 3,210 an man zinga za a 96 chu India khua leh tui an ni a, Myanmar mi chu za zela 4 chauh an ni a, Assam mi za zela 5 an ni thung a ti. India khua leh tui an man zinga mi 2,833 (za zela 92) chu Mizoram a cheng nghet an ni. India ram hmun danga cheng an mante chu - Manipur mi 44 leh Tripura mi 24 te an ni, a ti bawk.

He tiang a nih lai a Myanmar a kan unau, an ram buaina avanga rawn raltlante puh chhiat tum an awm reng mai chu pawl a tih thu sawiin adviser chu CM chuan hei hi Mizo hnam inunauna tichhe thei a ni a, a pawl hle a ni a ti. Pathian thu chuan keimahni kan inhmangaih anga kan mihringpuite hmangaih turin min zirtir a. Myanmar atanga rawn raltlante hi mihring ve bawk mai ni lovin Zofate an nih avangin thudik lo hmanga puhmawhna hian thil pawl zawk a thlen a hlahthawn thu a sawi a ni.



PACS

Adviser to Chief Minister Dr. Lorrain Lalpekliana Chinzah hova nimina South Lungpher ah Phawngpui Primary Agriculture Credit Cooperative Society (Phawngpui PACS) inhmukhawm an buatsaihah kuthnathawktu te tana hamthatna tur leh hmalakna tur chi hrang hrangte an sawiho.

He inhmukhawmna-ah hian Adviser to Chief Minister chuan Phawngpui PACS te hnathawh tawh leh hmalakna hrang hrangte chu a hriatpui thu leh, kuthnathawktu te hmasawn na'na an inpekna te chu fakawm a tih thu a sawi a. PACS in hma a sawn zel theihnan leh, a hnena an harsatna leh an mamawh an thlente chu a theih ang anga bawhzui a, hmalak a tum thu a sawi a. Phawngpui PACS chu ZPM sawrkar nena inhne rem tak, kuthnathawktu te hamthatna tura hmalatu te an ni a, sawrkar policy tih hlawhtlinna tura pêng pawimawh tak an nih thu a sawi.

Phawngpui PACS hi kum 2018 a din niin, Lawngtlai District-a Primary Agriculture Credit Co Operative Society awm chhun a ni mek a. Member 280 bawr vel awm mekin, kuthnathawktute hmasawna tur leh hamthatna turin kawng hrang hrang in hma an la thin a ni.

Dr. Lorrain Lalpekliana Chinzah chuan Phawngpui PACS te hnathawh dan leh an pisa hmalak dan tlangpuite a en chiang bawk a. He hunah hian LADC Executive Member LADC pahnih LADC Pu Pu LR. Dingliana leh Pu V. Zathanga te bakah, ZPM Lai District Headquarters Lawngtlai hruaitute pawh an tel a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni. Zanin dar 6 leh a chanve-ah Chanchinthar hi puan leh a ni ang.



JESAM

Adviser to CM (Finance & Planning) Pu TBC Lalvenchhunga chuan Junior Engineer Service Association of Mizoram(JESAM) inkhawmpui vawi 7-na khuallian niin hun a hmanpui.

Adviser to CM chuan a tawnhriat atangin JE-te chu an dinhmun leh hnathawhte a hriatthiam pui thu a sawi a. A hmuna a tak taka hna thawktu an nih thu leh harsatna a lo awm changa dem hmasak an hlawh thin thu te thlenga a hriatpui thu a hrilh a. Mizoram sawrkar hnathawkte zinga Service thila inepna awm nasa-in hnathawhna boruak a tichhia ni a a hriat thu pawh a sawi a. Hnathawh hrim hrimah kalphung siamthat ngai tam tak a la awm ni a hmuh thu a sawi a ni. Pu TBC Lalvenchhunga chuan JE te chu inzir zel a, thil thar lo chhuak apiang lo hriat ve zel a that thu hrilhin, eirukna laka fihlim chu mimal taka a thil ngaih pawimawh ber pawl a nih thu leh chu mi kawngah chuan sawrkar thawhpui tlat turin kalkhawm te chu a sawm a ni.

JESAM hi kum 2015 ah din niin an member-ah hian Junior Engineer, Diploma and Non-Diploma, B.E leh M.E te thlengin an a awm a. Works department hrang hrang PWD, P&E, PHE, Irrigation leh Department hrang hrangah an awm hlawm. Department dang neuh neuh tiam lovin hna luah theih 733 an nei a. thawk mek lai hi mi 520 an ni.



DISASTER

Aizawl District Disaster Management Authority chairman leh bawrhsap ni bawk Pu Lalhriatpuia chuan Zirtawpni khan inkhawm hmanhmawh kovin, Ngaizel lungtla avanga chhiatna thleng fo thin chungchanga hmalakna tur ruahmanna siam turin Aizawl District chhunga he lam department official-te a inkhawm pui.

Inkhawmah hian Geology & Mining, AMC, DM&R, PWD leh Aizawl Traffic police aiawhte telin, geological team ten a zirchianna an neih tawh atanga lung tlak chhan an zir chhuahte report ngaihthlak a ni a. Kawng hrang hranga hmalakna tur ruahmannate siam niin, a zir Chiang tur technical team pawh din nghal a ni.

Hemi ni vek khan DM&R Minister Prof.Lalnilawma chuan Ngaizel lungtla avanga vanduaina tawk ta Lalbiakdika(24) s/o Lalbiakmawia, Tachhip chhungte hnenah an khuaah kal chilhin zawngnadawmna cheng nuai li a lo hlan tawh bawk a ni.

